

BILO JE I TEŽIH ZADATAKA

Ministar odbrane Bosne i Hercegovine Selmo Cikotić uvjeren je da će naša zemlja ispuniti uslov postavljen na ministarskom sastanku u Tallinnu i uknjižiti 69 lokacija sa perspektivnom vojnom imovinom na MO, čim bude konstituisana nova vlast

Piše: **Daniel Omeragić**

Bosna i Hercegovina ove jeseni nije započela svoj prvi godišnji ciklus iz Akcionog plana za članstvo u NATO-u, iako je na sastanku u aprilu u Tallinnu (Estonija) pozvana u MAP.

Pozivnica je upućena sa skupa Sjevernoatlantskog vijeća (North Atlantic Council, NAC) na nivou ministara vanjskih poslova zemalja članica NATO-a i u ISAF formatu, nakon što je u oktobru prošle godine tadašnji predsjedavajući Predsjedništva BiH Željko Komšić - u prisustvu ministra odbrane BiH Selme Cikotića, načelnika Zajedničkog štaba Oružanih snaga BiH general-pukovnika Miladina Milojevića, ministra vanjskih poslova Svena Alkalaja i u to vrijeme šefa Misije BiH pri NATO-u u Bruxellesu Nikole Radovanića - predao aplikaciju naše zemlje za MAP.

Ustupanje kasarni

BiH je prva zemlja, potencijalna članica NATO-a, koja je uslovno primljena u Akcioni plan za članstvo, što je stvorilo dodatnu pomutnju. Od naših vlasti je zatraženo da uknjiže 69 perspektivnih lokacija sa nepokretnom vojnom imovinom na Ministarstvo odbrane BiH. Kako se to nije desilo do septembra, kada započinju redovni ciklusi iz Godišnjeg nacionalnog plana (ANP), koji predstavlja spisak zadataka koje zemlja mora ispuniti na putu prema NATO-u, BiH je morala odgoditi početak svog puta kroz MAP.

U Federaciji BiH i Republici Srpskoj drugačijim očima gledaju na ispunjavanje uslova iz Tallinna. Tako su stranke iz Federacije (SDA, SBiH, SDP i oba HDZ-a) saglasne da bi imovinu trebalo uknjižiti na Ministarstvo odbrane, odnosno državu, a Dodikov SNSD je voljan tek da kasarne i druge vojne objekte ustupi na korištenje državnim institucijama.

Ministar Cikotić kaže da se dosadašnja garnitura vlasti nije htjela baviti rješavanjem ovog pitanja, zato što je to moglo uticati na rezultate izbora.

- Očekujem da će se ovo biti riješeno nakon što se konstituiše nova vlast. Ne mislim da je riječ o kompleksnom i teškom pitanju. Rješavali smo i daleko složenija, ali kontekst tog pitanja može biti zanimljiv, zavisno od toga kako ga ko posmatra. Rješavanje statusa vojne imovine može da prejudicira status ostataka državne imovine. Može se i tako posmatrati i sa tog aspekta biti zanimljivo, a samo po sebi mislim



Selmo Cikotić

da to pitanje nije problematično ni za koga. Dakle, moguće ga je riješiti, ali ne bih se sada bavio nekom futuristikom. Bosna i Hercegovina treba lidere koji će preuzeti odgovornost za vođenje države i njenih institucija, kazao je Cikotić.

Politički čelnici su, smatra ministar odbrane BiH, od aprila do septembra više vodili računa o tome kako će proći na općim izborima, 3. oktobra, nego o tome u kojoj mjeri je moguće ispuniti uslov za početak primjene MAP-a. Cikotić podsjeća da smo prije četiri godine uspjeli ukinuti odbrambene strukture na nivou entiteta i formirati ih na nivou države. Riječ je o krupnom pitanju koje, vjeruje Cikotić, samo po sebi predstavlja reformu Ustava.

Majkić: Nismo razgovarali 20 godina

- Mi smo rekli da ta imovina ne treba da bude na nivou entiteta nego da bude puštena na nivo lokalne zajednice, koja treba da je koristi. To su stvari o kojima moramo razgovarati. Prošlo je 20 godina, a mi nismo razgovarali međusobno. Valjda će se uspjeti napraviti konkretan dijalog, da se dogovorimo o mnogim stvarima koje su vezane za budućnost. Živimo u zemlji u kojoj su politički akteri zaboravili da pričaju, u očekivanju da će neko drugi donijeti rješenje, kazala je Majkić.

- Kroz tu odbrambenu reformu rješavan je čitav niz pitanja, u smislu strukture, rasporeda jedinica, komandovanja i kontrole, učešća u NATO programu i međunarodnim misijama podrške miru. Svako od tih pitanja je kompleksnije nego ovo posljednje, koje se tiče imovine, rekao je Cikotić.

U Ministarstvu odbrane spremni su na razgovor kada danas-sutra svih 69 lokacija, koje su odlukom Predsjedništva BiH definirane kao perspektivne za Oružane snage BiH, bude uknjiženo na MO o eventualnom ustupanju lokalnoj zajednici objekata koji se neće koristiti u vojne svrhe.

- To su tehnički aspekti. Ne treba nijedno od rješenja posmatrati kao uklesano u kamenu. Moramo imati dinamičnu verziju gledanja i tretiranja tih pitanja. Nema nikakvih problema. Mi smo puno tih lokacija već predali, spremni smo da predamo neke nove lokacije lokalnim, civilnim strukturama, odnosno institucijama države na različitim nivoima, tako da nema razloga da se takva mogućnost ne razmatra i ne prakticira ubuduće, izjavio je Cikotić.

On tvrdi da u Ministarstvu odbrane postoji lista lokacija pripremljenih za predaju. Podsjeća da je vojska davno napustila kasarnu Jajce, na atraktivnoj lokaciji iznad stare jezgre Sarajeva, koja je spominjana kao mjesto na kojem će biti izgrađen ekskluzivni hotel. No, taj prostor trenutno niko ne koristi zato što nije definiran status vojne imovine.

- Investicije se tu ne realiziraju zato što niko neće da ulaže u nešto što ne zna čije je. Napustićemo i kasarnu "Safet Zajko" u Sarajevu. Takođe, pripremili smo i predali Univerzitetu u Tuzli kasarnu "Husein Kapetan Gradašćević", rekao nam je Cikotić.

I komandant NATO štaba u Sarajevu, brigadni general američke vojske David Enyeart, prilikom nedavnog susreta s novinarima izrazio je uvjerenje da će do septembra naredne godine Bosna i Hercegovina ispuniti uslov za početak primjene MAP-a. On smatra da se već vide pozitivni nagovještaji i da će se vrata otvoriti u februaru-martu naredne godine što će BiH odvesti na pravi put.

Iz ugla NATO-a u našoj zemlji su 2010. učinjeni bitni koraci u izgradnji sigurnosti i sudjelovanju BiH u međunarodnim mirovnim operacijama. Predsjedništvo BiH je tako proljetos donijelo odluku o uništavanju viškova naoružanja i municije, koje predstavlja opasnost ne samo po građane BiH nego i šire. Bo-



Naredne godine
nastavak puta
ka NATO-u

BOSNA I HERCEGOVINA je dala direktan doprinos kolektivnoj sigurnosti u svijetu upućujući sredinom oktobra pješadijsku jedinicu svojih Oružanih snaga u misiju podrške miru ISAF u Afganistanu

sna i Hercegovina je dala direktan doprinos kolektivnoj sigurnosti u svijetu upućujući sredinom oktobra pješadijsku jedinicu svojih Oružanih snaga u misiju podrške miru ISAF u Afganistanu.

Na ove dvije odluke u Sjevernoatlantskom savezu gledaju veoma blagonaklono i to je, između ostalog, dovelo do toga da BiH dobije uslovnu pozivnicu u MAP.

Predsjedavajuća Doma naroda Parlamentarne skupštine BiH i članica Zajedničke komisije za odbranu i sigurnost Dušanka Majkić (SNSD) kaže da će se novi politički akteri možda uspjeti dogovoriti o ključnim pitanjima kao što su popis stanovništva, državna imovina, uslovi za zatvaranje OHR-a "čime bi bio učinjen značajan napredak da BiH krene brže i prema evropskim i atlantskim integracijama."

- Vi znate za veoma čvrst i konzistentan stav SNSD-a. Državna imovina je pitanje koje se može riješiti samo na način da se sve ono što je potrebno za

obavljanje funkcija države i za što je prenesena nadležnost na institucije BiH, može dati na korištenje sve dokle treba, a nakon toga se vraća entitetima koji su vlasnici te imovine. Taj stav je u početku bio shvaćen dosta rigidno. Međutim, s obzirom na to da se situacija polako mijenja i u Federaciji i da je SDP, koji je donedavno bio opoziciona partija, dobio mogućnost da svoje političke ideje plasira, biće zanimljivo da vidimo kako će se nosioci vlasti u narednom periodu odnositi prema tom problemu. Možda to više neće biti tako problematično. Možda ono na čemu je isključivo insistirala Stranka za BiH neće više biti takav problem, kazala je Majkić.

Pokazati volju

Ona je podsjetila da je u međuvremenu donesen Zakon o statusu državne imovine u Republici Srpskoj, prema kojem je sve ono što se nalazi na teritoriji RS-

a vlasništvo tog entiteta. Majkić upozorava da ukрупnjavanje i centralizacija na nivo BiH nije savremeni pogled na život.

- U mnogim zemljama se sve spušta na lokalni nivo, a mi podižemo na državni nivo. Dakle, nema tu baš mnogo stvari koje bi morale biti problematične. Vjerujem da će politički akteri pokazati malo više volje da se to tako i dogovori. A sve ono što bude dogovoreno među nama, prihvaćće međunarodna zajednica biće rješenje za sve, kazala je Majkić.

Ovdje se, ipak, radi o jasnoj zadaći koju nam je postavio NATO da se vojna imovina knjiži na državu.

- Čula sam ja mnogo takvih zahtjeva, koji su bili adresirani u ime nekih značajnih institucija. Poslije se vidjelo da su oni bili napravljeni u BiH i samo eksportovani prema nekim institucijama. Onog momenta kada se dogovorimo to će biti rješenje za sve one koji traže od nas da se nešto uradi, rekla je Majkić. ■